



JABATAN HAL EHWAL AGAMA ISLAM NEGERI SABAH

جَبَاتنْ هَالْ اَهْوَالْ اِاْمَا اِسلامْ نِغِريْ سَابَاْ

KHUTBAH JUMAAT PERTAMA DAN KEDUA

16 JAMADILAWAL 1447H / 07 NOVEMBER 2025M

“GAZA PALESTIN, TANGGUNGJAWAB KITA BERSAMA”

Disediakan oleh:
Jabatan Hal Ehwal Agama Islam Negeri Sabah (JHEAINS)

Arahan kepada PTA/ PPMD/ AJK MASJID/ SURAU:

- Seksyen 97, Enakmen 3 Tahun 1995, Enakmen Kesalahan Jenayah Syariah 1995, Bahagian IV - Kesalahan Khutbah menyatakan bahawa menjadi kesalahan bagi khatib yang membaca khutbah Jumaat yang bukan disediakan, disemak atau diluluskan oleh Majlis dan boleh, apabila disabitkan, dikenakan hukuman denda tidak melebihi dua ribu ringgit atau penjara selama tempoh tidak melebihi satu tahun atau kedua-duanya sekali.
- Khatib hendaklah menyemak terlebih dahulu khutbah ini sebelum disampaikan kepada para jemaah supaya sempurna rukun dan baris agar dapat disampaikan dengan fasih dan lancar.
- Khutbah ini hendaklah dibaca oleh Imam Qariah atau Imam Rawatib yang bertugas di masjid atau surau yang berkenaan kecuali ada kebenaran khas dari Jabatan Hal Ehwal Agama Islam Negeri Sabah (JHEAINS).
- Khutbah hendaklah disampaikan pada tarikh dan masa yang ditetapkan oleh JHEAINS.
- Khatib tidak dibenarkan meminda isi perkataan dalam khutbah ini kecuali untuk menyempurnakan rukun khutbah, kesilapan ejaan dan baris pada ayat-ayat al-Quran & Hadis yang terkandung di dalamnya.
- Khutbah hendaklah disampaikan dalam tempoh 10 - 15 minit sahaja.



Mohon semak QR code ini jika ada sebarang cadangan penambahbaikan. Sekian, terima kasih

KHUTBAH PERTAMA

الْحَمْدُ لِلَّهِ الْقَائِلِ:

إِنَّمَا الْمُؤْمِنُونَ الَّذِينَ ءَامَنُوا بِاللَّهِ وَرَسُولِهِ ثُمَّ لَمْ يَرْتَابُوا وَجَاهَدُوا بِأَمْوَالِهِمْ
وَأَنْفُسِهِمْ فِي سَبِيلِ اللَّهِ أُولَئِكَ هُمُ الصَّادِقُونَ ﴿١٥﴾ (الحجرات : 15)

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ
وَرَسُولُهُ. اللَّهُمَّ صَلِّ وَسَلِّمْ وَبَارِكْ عَلَى حَبِيبِنَا وَشَفِيعِنَا مُحَمَّدٍ، أَشْرَفِ الْأَنْبِيَاءِ
وَالْمُرْسَلِينَ، وَعَلَى آلِهِ وَصَحْبِهِ أَجْمَعِينَ، وَالتَّابِعِينَ لَهُمْ بِإِحْسَانٍ إِلَى يَوْمِ الدِّينِ.

أَمَّا بَعْدُ، أَيُّهَا الْمُسْلِمُونَ، أُوصِيكُمْ وَإِيَّايَ بِتَقْوَى اللَّهِ
قَالَ اللَّهُ تَعَالَى: يَا أَيُّهَا الَّذِينَ ءَامَنُوا اتَّقُوا اللَّهَ حَقَّ تُقَاتِهِ وَلَا تَمُوتُنَّ إِلَّا وَأَنْتُمْ
مُسْلِمُونَ

JAMAAH MUSLIMIN YANG BERBAHAGIA,

Pada hari Jumaat yang penuh barakah ini, khatib ingin berpesan kepada diri sendiri serta jamaah sekalian, marilah sama-sama kita berusaha memperbaharui dan memperkukuh ketakwaan kita kepada Allah SWT dengan melaksanakan segala perintah-Nya dan menjauhi segala larangan-Nya. Pada hari yang mulia ini khatib akan membicarakan khutbah yang bertajuk **“GAZA PALESTIN, TANGGUNGJAWAB KITA BERSAMA.”**

MUSLIMIN YANG DIRAHMATI ALLAH SWT SEKALIAN,

Bumi Palestin dan Masjid Al-Aqsa adalah isu yang kekal segar dalam nadi umat Islam seluruh dunia. Ia bukan sekadar tanah atau isu politik semata-mata, tetapi ia adalah isu akidah yang menjadi ujian terbesar kepada keimanan dan persaudaraan kita. Masjid Al-Aqsa mempunyai kedudukan yang amat tinggi dalam Islam. Ia adalah kiblat pertama umat Islam dan

merupakan tempat persinggahan Rasulullah SAW dalam peristiwa Israk dan Mikraj. Allah SWT berfirman dalam surah al-Isra' ayat 1:

سُبْحَنَ الَّذِي أَسْرَىٰ بِعَبْدِهِ ۖ لَيْلًا مِّنَ الْمَسْجِدِ الْحَرَامِ إِلَى الْمَسْجِدِ الْأَقْصَا الَّذِي
بَرَكْنَا حَوْلَهُ ۖ لِنُرِيَهُ ۖ مِنْ ءَايَاتِنَا إِنَّهُ هُوَ السَّمِيعُ الْبَصِيرُ ﴿١﴾

Maksudnya: “Maha Suci Allah yang telah menjalankan hamba-Nya (Muhammad) pada malam hari dari Masjid Al-Haraam (di Makkah) ke Masjid Al-Aqsa (di Palestin), yang Kami berkati sekelilingnya, untuk memperlihatkan kepadanya tanda-tanda (kekuasaan dan kebesaran) Kami. Sesungguhnya Allah jualah yang Maha Mendengar, lagi Maha Mengetahui.”

Keberkatan di sekeliling Masjid Al-Aqsa merujuk kepada seluruh bumi Syam termasuk Palestin. Inilah bumi para Nabi, bumi perjuangan dan jihad. Justeru, setiap usaha untuk membela dan mempertahankan bumi Palestin adalah sebahagian daripada ibadah dan tuntutan iman yang mesti kita pikul bersama. Tanggungjawab untuk mempertahankan kesuciannya adalah fardu yang tidak boleh digugurkan.

HADIRIN JUMAAT YANG DIRAHMATI ALLAH SWT,

Pada hari yang mulia ini, marilah kita bersama-sama merenung dan menginsafi keadaan saudara kita di bumi Palestin, khususnya di Gaza. Tanah yang diberkati, tanah para nabi, tanah yang menjadi saksi kepada perjuangan dan pengorbanan umat Islam sepanjang zaman. Namun kini, Gaza menjadi medan penderitaan, kesengsaraan dan kezaliman yang tiada penghujungnya.

Saban hari, kita disajikan dengan berita yang menyayat hati. Penduduk Gaza dibunuh tanpa belas kasihan. Masjid-masjid yang sepatutnya menjadi tempat sujud dan ketenangan, kini menjadi sasaran peluru dan bom. Sekolah-sekolah yang sepatutnya menjadi tempat ilmu, kini menjadi kubur kepada generasi muda. Hati kecil mana yang tidak tersentuh, mata mana yang tidak mengalir air mata, apabila melihat penderitaan saudara-saudara kita di Gaza, Palestin. Konflik di bumi Anbia ini bukanlah isu baharu, bahkan ia adalah luka berdarah yang memanjang sejak bertahun lamanya.

Penderitaan mereka adalah isyarat jelas kepada kita tentang tuntutan persaudaraan Islam. Rasulullah SAW telah meletakkan asas kukuh persaudaraan seumpama satu jasad, di mana rasa sakit satu anggota akan dirasakan oleh seluruh tubuh. Hadis daripada Nu'man bin Basyir, bahawa Rasulullah SAW bersabda:

مَثَلُ الْمُؤْمِنِينَ فِي تَوَادِّهِمْ وَتَرَاحُمِهِمْ وَتَعَاطُفِهِمْ مَثَلُ الْجَسَدِ، إِذَا اشْتَكَى مِنْهُ عُضْوٌ، تَدَاعَى لَهُ سَائِرُ الْجَسَدِ بِالسَّهَرِ وَالْحُمَّى

Mafhumnya: *“Perumpamaan orang-orang mukmin dalam berkasih sayang, saling mencintai dan saling berbelas kasihan adalah seperti satu jasad. Apabila salah satu anggota jasad mengadu sakit, maka seluruh anggota jasad akan turut berasa sakit, tidak dapat tidur dan demam.”* (HR Muslim).

Hadis ini bukan sekadar peringatan, tetapi satu perintah yang jelas. Umat Islam adalah satu anggota tubuh, satu keluarga, satu ummah. Apabila satu anggota sakit, seluruh tubuh turut merasa sakit. Ini bermaksud penderitaan Gaza adalah penderitaan kita. Kesengsaraan Palestin adalah kesengsaraan kita. Persoalannya, di mana dan bagaimana tanggungjawab kita sebagai saudara?

SIDANG JAMAAH JUMAAT DIBERKATI ALLAH SWT,

Tentera Hamas telah mengesahkan bahawa satu perjanjian telah termeterai bagi menamatkan perang di Gaza melalui genjatan senjata bagi kedua belah pihak Hamas mahupun pihak Zionis, Israel. Dalam perjanjian tersebut turut merangkumi pengunduran tentera Israel serta pelaksanaan pertukaran tahanan dan tebusan. Sungguhpun genjatan senjata telah diumumkan, hakikatnya kedamaian yang diharapkan belum benar-benar terjamin. Hanya beberapa minggu selepas pengumuman genjatan senjata tersebut, dunia dikejutkan dengan serangan udara rejim Zionis laknatullah. Kita turut dikejutkan dengan berita kematian As-Sayid Saleh Al-Jafarawi, seorang wartawan Palestin yang terkenal semasa membuat liputan kemanusiaan di kawasan Gaza.

Insiden ini bukanlah pertama kalinya berlaku, bahkan ia mencerminkan betapa perjanjian genjatan senjata sering dicabuli tanpa rasa tanggungjawab. Malahan nyawa rakyat Palestin termasuk wartawan, doktor, dan sukarelawan terus menjadi korban kekejaman yang tidak

berperikemanusiaan. Dalam konteks ini, para ulama seperti Syeikh Dr. Yusuf Al-Qaradawi dan Dr. Wahbah Al-Zuhaili menegaskan bahwa **mempertahankan hak dan maruah umat Islam daripada penjajahan dan penindasan merupakan fardu kifayah**, dan sesiapa yang berdiam diri terhadap kezaliman adalah termasuk dalam golongan yang lemah imannya.

Sejarah telah membuktikan bahawa rejim Zionis Israel berulang kali mengkhianati perjanjian damai dan gencatan senjata yang ditandatangani bersama pihak Palestin dan masyarakat antarabangsa. Allah SWT telah pun menggambarkan sifat angkuh Bani Israel menerusi firman-Nya dalam surah al-Baqarah ayat 100:

أَوْكَلَمَا عَاهَدُوا عَهْدًا نَبَذَهُ فَرِيقٌ مِّنْهُمْ بَلْ أَكْثَرُهُمْ لَا يُؤْمِنُونَ ﴿١٠٠﴾

Maksudnya: *“Patutkah (mereka ingkarkan ayat-ayat keterangan itu) dan patutkah tiap-tiap kali mereka mengikat perjanjian setia, dibuang dan dicabuli oleh segolongan dari mereka? Bahkan kebanyakan mereka tidak beriman.”*

Ayat tersebut menjelaskan bahawa sifat mungkir janji dan menipu dalam perjanjian telah pun disebut oleh Allah SWT sebagai antara tabiat yang melekat pada golongan yang menolak kebenaran. Maka tidak hairanlah jika rejim Zionis yang mewarisi sikap ini berterusan melanggar perjanjian atas dasar tamak, kebencian, dan keangkuhan.

HADIRIN JUMAAT YANG DIKASIHI SEKALIAN,

Islam mengajar kita konsep *Ukhuwah Islamiah* (Persaudaraan Islam). Penderitaan yang menimpa saudara kita di Gaza adalah sakit yang dirasakan oleh seluruh tubuh umat Islam. Oleh itu, mimbar menyeru, sebagai sebahagian daripada jasad ummah yang besar ini, kita wajib menunaikan tanggungjawab kita mengikut ruang lingkup kemampuan masing-masing iaitu:

Pertama: Solidariti melalui Infaq dan Bantuan Kemanusiaan.

Kita mungkin tidak mampu berjuang dengan mengangkat senjata, tetapi kita masih mempunyai kekuatan harta. Salurkanlah sebahagian rezeki kita melalui tabung-tabung dan misi kemanusiaan yang **rasmi** dan **diyakini**. Di saat saudara kita berdepan kelaparan, kedinginan, dan kesakitan, sumbangan harta kita menjadi nafas baharu bagi mereka.

Sumbangan ini bukan sekadar wang, tetapi manifestasi jihad dengan harta seperti yang dianjurkan oleh Allah SWT dalam surah al-Hujurat ayat 15:

إِنَّمَا الْمُؤْمِنُونَ الَّذِينَ ءَامَنُوا بِاللَّهِ وَرَسُولِهِ ثُمَّ لَمْ يَرْتَابُوا وَجَاهَدُوا بِأَمْوَالِهِمْ وَأَنْفُسِهِمْ فِي سَبِيلِ اللَّهِ أُولَٰئِكَ هُمُ الصَّادِقُونَ ﴿١٥﴾

Maksudnya: “Sesungguhnya orang-orang yang sebenar-benarnya beriman hanyalah orang-orang yang percaya kepada Allah dan Rasul-Nya, kemudian mereka (terus percaya dengan) tidak ragu-ragu lagi, serta mereka berjuang dengan harta benda dan jiwa mereka pada jalan Allah; mereka itulah orang-orang yang benar (pengakuan imannya).”

Kedua: Senjata Doa dan Qunut Nazilah yang Berterusan.

Doa adalah senjata terhebat orang mukmin. Kita mungkin terpisah oleh lautan, namun kita disatukan dengan doa. Doa Qunut Nazilah adalah benteng spiritual kita, memohon pertolongan agar Allah SWT mengurniakan pertolongan, kekuatan, dan kemenangan kepada pejuang Palestin, melindungi rakyat Gaza daripada kezaliman, serta menghancurkan rejim zionis yang zalim.

Ketiga: Menyebarkan Kesedaran dan Menjauhi Sikap Berdiam Diri.

Kita perlu terus menyebarkan maklumat yang sahih tentang kezaliman yang berlaku agar dunia sedar dan bangkit menentang kejahatan. Kita juga wajib memberikan sokongan penuh kepada segala usaha yang dilakukan oleh kerajaan dan badan-badan bukan kerajaan (NGO) dalam misi bantuan, diplomatik, dan pembangunan semula Gaza. Jangan biarkan kezaliman dinormalisasikan. Sampaikanlah kebenaran tentang Palestin dan juga penderitaan seluruh umat Islam yang tertindas walau di mana jua mereka berada. Marilah bersatu padu menegakkan kebenaran.

Menyokong yang benar dan menentang yang batil adalah sebahagian daripada *amar ma'ruf dan nahi munkar*. Rasulullah SAW bersabda, **mafhumnya:** “Sesiapa di antara kamu melihat kemungkaran, maka ubahlah dengan tangannya. Sekiranya tidak mampu, maka ubahlah dengan lidahnya. Sekiranya tidak mampu, maka ubahlah dengan hati, dan itu adalah selemah-lemah iman.” (HR Imam Muslim)

JAMAAH JUMAAT YANG DIRAHMATI ALLAH SWT,

Menyimpul khutbah hari ini, khatib ingin menyeru jamaah sekalian agar kita semua menjadikan isu Palestin sebagai keutamaan yang tidak pernah padam dalam hati kita. Peliharalah amanah ini dengan penuh keimanan dan kesungguhan.

Oleh itu, marilah kita bersatu hati menghentikan segala perbalahan. Semaikan semula kasih sayang sesama Muslim dan teguhkan *ukhuwah Islamiah*. Semangat perpaduan kita adalah kekuatan yang ditakuti musuh-musuh Islam. Jika umat Islam bersatu, tiada kuasa dunia yang mampu memecahbelahkan kita. Dengan itu, kita boleh memartabatkan kembali kekuatan ukhwah, penyatuan ummah, penguasaan ekonomi serta kualiti sosial umat Islam pada masa hadapan.

Justeru, tanggungjawab kita kepada Palestin adalah satu kewajipan yang akan dipersoal di hadapan Allah SWT. Penderitaan mereka adalah isyarat kepada kita bahawa umat Islam mesti bersatu padu dan bangkit menentang sebarang bentuk kezaliman. Ingatlah janji Allah yang disebutkan dalam surah Muhammad ayat 7:

يَا أَيُّهَا الَّذِينَ ءَامَنُوا إِن تَنصُرُوا اللَّهَ يَنصُرْكُمْ وَيُثَبِّتْ أَقْدَامَكُمْ ﴿٧﴾

Maksudnya: “Wahai orang-orang yang beriman, kalau kamu membela (agama) Allah nescaya Allah membela kamu (untuk mencapai kemenangan) dan meneguhkan tapak pendirian kamu.”

بَارَكَ اللَّهُ لِي وَلَكُمْ بِالْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا وَاسْتَغْفِرُ اللَّهَ الْعَظِيمَ لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ، الْأَحْيَاءِ مِنْهُمْ وَالْأَمْوَاتِ، فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.

تيكس خطبة كدوا

الْحَمْدُ لِلَّهِ رَبِّ الْعَالَمِينَ، وَالصَّلَاةُ وَالسَّلَامُ عَلَى سَيِّدِنَا مُحَمَّدٍ، وَعَلَى آلِهِ وَأَصْحَابِهِ أَجْمَعِينَ وَمَنْ تَبِعَهُمْ بِإِحْسَانٍ إِلَى يَوْمِ الدِّينِ.

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ.

أَمَّا بَعْدُ، فَيَا عِبَادَ اللَّهِ، اتَّقُوا اللَّهَ حَقَّ تُقَاتِهِ وَاعْلَمُوا أَنَّ اللَّهَ أَمَرَكُمْ بِأَمْرِ عَظِيمٍ، أَمَرَكُمْ بِالصَّلَاةِ وَالتَّسْلِيمِ عَلَى نَبِيِّهِ الْكَرِيمِ، فَقَالَ اللَّهُ تَعَالَى:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا.

اللَّهُمَّ صَلِّ عَلَى سَيِّدِنَا مُحَمَّدٍ وَعَلَى آلِ سَيِّدِنَا مُحَمَّدٍ، كَمَا صَلَّيْتَ عَلَى سَيِّدِنَا إِبْرَاهِيمَ وَعَلَى آلِ سَيِّدِنَا إِبْرَاهِيمَ، وَبَارِكْ عَلَى سَيِّدِنَا مُحَمَّدٍ وَعَلَى آلِ سَيِّدِنَا مُحَمَّدٍ كَمَا بَارَكْتَ عَلَى سَيِّدِنَا إِبْرَاهِيمَ وَعَلَى آلِ سَيِّدِنَا إِبْرَاهِيمَ فِي الْعَالَمِينَ إِنَّكَ حَمِيدٌ مَجِيدٌ.

آمِينَ يَا رَبَّ الْعَالَمِينَ. اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ. اللَّهُمَّ أَنْزِلِ الرَّحْمَةَ وَالْبَرَكَاتِ وَالْهُدَايَةَ وَالسَّلَامَةَ وَالسَّكِينَةَ وَالصِّحَّةَ الدَّائِمَةَ عَلَى مَلِكِنَا كِبَاوَه دُولِي يَغْ مَا مَوْلِيَا سِرِي قَادُوكْ بَكِينِدَا يَغْ دَفَرْتَوَانْ أَكُوغْ وَكَذَلِكَ عَلَى فَخَّامَةِ الرَّئِيسِ الْأَعْلَى تَوَانْ يَغْ تَرَاوْتَامْ يَغْ دَفَرْتَوَانْ نَكْرِي سَابَه. وَاجْعَلِ اللَّهُمَّ هَذِهِ الْبَلَدَةَ وَسَائِرَ بِلَادِ الْمُسْلِمِينَ أَمْنَةً مُطْمَئِنَّةً، إِنَّكَ رَعُوفٌ رَحِيمٌ.

اللَّهُمَّ ادْفَعْ عَنَّا الْبَلَاءَ وَالْوَبَاءَ وَالْفَحْشَاءَ وَالْمُنْكَرَ وَالْمِحْنَ وَالْفِتْنَ، مَا ظَهَرَ مِنْهَا وَمَا بَطَنَ، مِنْ بَلَدِنَا هَذَا خَاصَّةً، وَمِنْ بُلْدَانِ الْمُسْلِمِينَ عَامَّةً، إِنَّكَ عَلَى كُلِّ شَيْءٍ قَدِيرٌ.

Ya Allah, selamatkanlah saudara kami yang dizalimi di bumi barakah Palestin, Sudan dan Negeri Syam sekitarnya. Kasihani dan limpahkanlah Rahmat-Mu ke atas mereka.

Ya Allah! Naungilah kehidupan, negeri dan juga negara kami. Hiasilah diri kami dengan sifat terpuji dan jauhi kami dari sifat yang keji. Satukanlah hati kami dalam menegakkan kebenaran dan mencegah segala kebatilan. Jadikanlah kami dan keturunan kami orang-orang yang istiqamah mendirikan solat secara berjemaah, menunaikan zakat, berpuasa dalam bulan Ramadan, mengerjakan ibadah haji, mewakafkan harta dan berinfak pada jalan yang Engkau redai. Sesungguhnya hanya kepada-Mu jua Ya Allah tempat kami mengadu dan memohon pertolongan.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.
عِبَادَ اللَّهِ،

إِنَّ اللَّهَ يَأْمُرُ بِالْعَدْلِ وَالْإِحْسَنِ وَإِيتَايَ ذِي الْقُرْبَى وَيَنْهَى عَنِ الْفَحْشَاءِ وَالْمُنْكَرِ
وَالْبَغْيِ يَعِظُكُمْ لَعَلَّكُمْ تَذَكَّرُونَ
فَاذْكُرُوا اللَّهَ الْعَظِيمَ يَذْكُرْكُمْ، وَاشْكُرُوا لَهُ عَلَى نِعَمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِكُمْ
وَلَذِكْرُ اللَّهِ أَكْبَرُ، وَاللَّهُ يَعْلَمُ مَا تَصْنَعُونَ.

Disediakan dan diedar oleh:

Bahagian Penyelidikan dan Informasi, Jabatan Hal Ehwal Agama Islam Negeri Sabah

NOTA:

Teks khutbah ini mengandungi potongan ayat-ayat al-Quran dan Hadis Rasulullah SAW. Mohon jaga dengan cermat dan tidak disepahkan.

Sebarang pertanyaan atau maklum balas, sila hubungi

Unit Penerbitan, Bahagian Penyelidikan dan Informasi, Jabatan Hal Ehwal Agama Islam Negeri Sabah

Hubungi [088-522127/](tel:088-522127) jheains.penerbitan@gmail.com untuk sebarang pertanyaan/ maklumat lanjut.